

Impuls für die Woche ab Sonntag, den 14. November 2021



Jedanke zwesche Dag und Düster

De Däch* wäde kööter, fröh weed et ald düster. Mer setz jitz jet mih en der Wonnung eröm, un af un an kütt mer an et simeleere üvver dat, wat alles esu passeet en der Welt. Villeich och üvver die Froch: Herrjott, wo besde eijentlich?

Do brennt der Bösch, janze Wälder ston en Flamme. Kütt dat vun selvs?
Hät der Herrjott nit opjepass? Ov han Minche do nohjeholfe?

Do fällt Wasser vum Himmel - emmerwies, nä büddewies, klein Bäächelche künne die Bröh nit mih halde, wäde riesich jroß, rieße Hüser, jo et janze Dörp met sich fott; Minsche versuffe ov han nix mih för öm un an. Wä es dat schold? Hät der Herrjott nit opjepass ov maache mer Minsche jet verkeht?

Do wäde Minsche vun derheim verdrevve, müsse laufejon, weil dat, wat se zum Levve bruche, nit ze krijje es, ov dat Winnije, wat se han, inne noch afjenomme weed: Brut, Wasser, Arbeit, Ansinn, Bildung, Millezing. Wodran litt dat? Hät der Herrjott „die Güter dieser Welt“ nit jeräch jenoch op alle Minsche verdeilt? Ov sin do welche, die der Hals nit voll krijje, alles an sich rieße welle un en de eije Täsche stoppe noh dem Motto: „De Haupsach ICH! Un DO - do kanns zosinn, wo de blievs!“

Herrjott, wo besde?

Häs Do uns nit en herrliche Welt jeschenk, domet mer fruh un jlöcklich dodren levve künne? Un wat han meer dodrus jemaht!? Un jitz, wo et bal zespät es, do kumme mer an un froge: „Wo besde eijentlich Herrjott, kunnste nit jet besser op uns oppasse?“

„Enä“, kanns Do jitz sage, „dat es nit ming Saach; ich han üch zwor de Freiheit jejevve, ävver och der Verstand.“ „Do häs Räch“, müsse meer dann sage, „und dä Verstand, dä hätte mer dann villeich jet fröher bruche solle.“

*Übersetzungshilfe:

Däch - Tage

büddewies - büttenweise

nix för öm un an - nichts anzuziehen

ov - oder

simeleere - grübeln

krijje - bekommen

Millezing - Medizin



Dieser Impuls wurde geschrieben von Bernhard Dannhäuser